

Jn 20, 19-23
Pentecost

Dihay usa ka abogado nga inila kaayo sa usa ka lugar. Listo kaayo siya ug hait kaayog salabutan apan sa iyang pagka-bright midako pod ang iyang ulo. Usa niana ka higayon nagpasaka siyag kaso atubangan sa usa ka huwes nga sa iyang tan-aw may pagka-hinayon ug dili sama kaniya ka 'bright'. Human sa taas kaayong presentasyon sa abogado mikomentaryo ang huwes nga nalubog ang pipila ka isyo ug busa dili na hinoon kaayo maklaro niya ang kaso. Busa gisumada pag-usab sa bright nga abogado ang tanang mga isyu ug ingon man ang ilang mga implikasyon. Ubag pagtahud gipasalamatan siya sa huwes nga midugang og pagpadayag nga wala ra gihapon mapun-i ang iyang kaalam. "Tinuod tingali na," matud pa sa abogado, "apan nadugangan man usab ang imong informasyon."

Sa ebanghelyo karong adlaw atong nadungog ang katapusang pakigpulong ni Jesus sa iyang mga tinun-an. Iyang gisaad nga padad-an niya silag maayong manlalaban. Kasagaran may panginahanglan lang og abogado kon adunay kasamok. Daghang mangita niya. Dayon anaa tingali pagpanakop, pagpasakag sumbong o kaso, mga sesyon sa korte, ug sa katapusan adunay paghukum ug pagsentensya.

Ang gisaad ni Jesus sa iyang mga tinun-an mao nga ang manlalaban nga iyang ipadala maoy mopalingkawas nila gikan sa kalibog ug kasamok ngadto sa tibuok nga kamatuoran. Ang abogado nga iyang ipadala dili tawhanong manlalaban kondili ang Espiritu sa kamatuoran nga nagagikan sa Amahan. Gihupay ni Jesus ang iyang mga sumusunod pinaagi niining saad: "Daghan pa unta kog isulti kaninyo apan dili pa kamo makadawat niini karon. Apan inig-abut sa Espiritu sa kamatuoran dad-on kamo niya ngadto sa tibuok nga kamatuoran."

Usa sa mga interesanteng hulagway o kinaiya sa Ebanghelyo ni San Juan mao nga iyang gipresentar ang sugilanon ni Jesus sama sa usa ka kaso. Usa kini ka kaso tali sa Dios ug sa kalibutan nga walay pagtoo. Gilaray ang mga saksi aron paglantugi sa kaso. Unsa man ang kaso? Mao kini: **Si Jesus ba gayud ang Mesiyas ug Anak sa Dios?**

Kinsa man ang mga saksi sa Dios? Mao kini ang iyang mga saksi: Ang iyang Pulong diha ni Jesus, ang bantugang propeta nga si San Juan Bautista, ang mga timailhan ug mga dagkong buhat ni Jesus, ingon man ang Espiritu Santo ug mga apostoles. Mao nay pundok sa mga saksi nga milaban sa giangkong ug gibarugan nga si Jesus Anak gyud sa Dios. Sa

laing bahin kinsa man ang kontra o kaatbang sa Dios? Sila mao ang mga Judio nga walay pagtoo. Duna sab silay mga argumento batok sa gibarugan sa ilang kaatbang.

Sa proceso na sa paghukom ni Jesus, ang mga kaaway gidapit nga motestigos bahin sa mga dautang buhat nga gisumbong batok ni Jesus. Maisugong gihagit ni Jesus ang opisyal sa korte: “Kon nakasulti akog dautan ipamatuod kini apan kon husto ang akong gipamulong, nganong dapatan man ko nimo?” Walay nakasukol sa iyang hagit. Sumala sa taho ni Juan, nakadaug si Jesus sa labing importanteng kaso sa kasaysayan. Ug tungod kay gidiklarar man ni Pilato sa makatolo nga siya inocente, ang maghuhukom hinoon maoy ‘na-convicted’ kay misukwahi man siya sa hustisya tungod kay si Jesus gipalansang man hinoon niya sa krus. Dayag kaayo nga gidramadrama lang ang paghukom ni Jesus; ang inosenting tawo gihukman sa kamatayon!

Apan sa pagkamatay ni Jesus, wala matapus ang kaso. Ang iyang giangkong nga siya mao ang Mesiyas ug ang Anak sa Dios namatud-an diha sa iyang pagkabanhaw. Diha sa pagkabanhaw, ang inosente gihimaya sa Dios. Apan anaa pay daghan nga wala modawat ug dili modawat sa ebidensya. Ang prinsipal nga manlalaban karon sa giangkong ni Jesus bahin sa iyang kaugalingon mao ang Espiritu Santo. Siya ang dakong abogado nga nanalipod sa giangkong ni Jesus atubangan sa korte sa dili matoohong kalibutan. Ug ang prinsipal nga mga testigos mao ang mga apostoles – kadto sila nga nakig-uban ni Jesus sukad pa sa sinugdanan sa iyang pagsangyaw sa maayong balita sa Ginharian.

Karong adlaw atong gisaulog piyesta sa Pentecostes. Kini mao ang pagkunsad sa Espiritu Santo isip Manlalaban sa mga tinun-an ni Jesus. Siyay nakapahimo sa mga apostoles nga motestigos sa giangkong ni Jesus dinhi sa kalibutan. Sa wala pa moabut ang Espiritu Santo, ang mga apostoles nangahadlok ug walay kapasidad sa pagsaksi. Tungod sa ilang kahadlok, kalibog, kasakit ug kawalay paglaum dili sila mahimong epektibo nga mga saksi ni Jesus. Apan pinaagi sa panabang ug gahum sa Espiritu Santo gigasahan silag lab-as nga kadasig ug kaisog sa pagtoo. Ang ilang korte mao na ang tibuok kalibutan ug, atubangan kang bisan kinsa nga may dalunggan sa pagpamati, kanunay silang andam nga mosaksi sa kamatuoran sa giangkong ug gibarugan ni Jesus.

Sumala sa atong kasinatian, wala pa matapus ang maong kaso; kini nagpadayon pa. Magpadayon kanunay ang kontra o kaaway; magpadayon kanunay ang hagit sa pagkombinsir sa maghuhukom bahin sa kamatuoran ni Jesus. Mopadayon ang Espiritu Santo sa pagka-Abogado o pagka-

Manlalaban nga naghagit sa mga Kristiyanos latas sa katuigan, lakip karon, nga moduol na sa atubangan aron pagsaksi sa kamatuoran.

Karong panahona dili ba kita man ang mga saksi? Dili ba kita man ang gisangonan sa pagpadayon sa kaso sa ngalan ni Jesus? Ang kalibutan nga kulang sa pagtoo nagpaabut kanatong mga saksi ni Jesus sa pagpresentar sa kalig-on sa atong kaso ug baruganan dili tanto pinaagi sa kalidad sa atong mahatag nga informasyon, kondili pinaagi sa kalidad sa atong kinabuhi ug kadasig sa atong pagtoo.

Kon himatyon man gani ang kalibutan kana dili tungod sa kakulang og mga informasyon. Nanubra ang informasyon. Himatyon ang kalibutan tungod sa kakulang og **kinabuhi sa ngalan ni Jesus**. Sa panapus ni San Juan Ebanghelista sa iyang presentasyon sa kaso ni Jesus iyang gipahimangnoan ang mobasa sa ebanghelyo nga kini iyang gipresentar “aron motuo kamo nga si Jesus mao ang Kristo, ang Anak sa Dios, ug sa inyong pagtoo niini makabaton kamog kinabuhi sa iyang ngalan.”

Busa mga igsoon padayon ang kaso. Padayon ang atong pagsaksi, uban sa panghinaut nga ang ubang mga tawo nga walay pagtoo makadawat sa gasa sa pagtoo gikan sa Espiritu Santo ug makabaton silag kinabuhi sa ngalan ni Jesus.

Ang mga apostoles ug unang mga tinun-an, ilabi na si Maria, maoy atong mga modelo sa pagsaksi. Si Maria nakig-uban sa mga apostoles sa ilang pag-ampo ug sa ilang pagsaksi. Sama sa Espiritu Santo, si Maria usab gihatag ni Jesus nato aron mahimo natong especial nga sumbanan. Sama nga nakig-uban siya sa mga apostoles, makig-uban usab siya kanato sa atong pagpadayon sa kaso. Si Maria gihatag ni Jesus aron mahimong Inahan sa Simbahan, sa ato pa, Inahan sa mga tawong matoohon ug masaksihon.